

con li soi libri, et dimanda la fida per 2 mexi a ditto officio, zoè che non possi esser molestado la sua persona. Et poi che la ghe vien data, vien a esser homo di questi sora consoli; et poi, compiti li 2 mexi, non si potendo acordar con li creditor, ditti signori vanno il sabado dopoi dinar a la xl.^{ia} criminal, et ivi o vero prolunga la fida, o si acorda *etc.* Questi erano prima 3, ma al tempo de Francesco Foscari, dose, ne fo azonto el quarto, el qual sta mexi 4 a la cassa. Questo non se impazza in dar audientia, ma ben in vender li pegni al publico incanto a Rialto, de li zudei che imprestano a Mestre danari a' christiani, et qui vendeno, traze il cavedal et l'usura, et el resto salva per colui de chi è il pegno. Et nota una eccellente cossa de Veniexia, che niun zudio, sotto grandissime pene, puol tegnir banco d'imprestar qui a Veniexia danari, ma ben a Mestre. Hor, compido el termine statuido, vieno qui a far vender li pegni. Hanno superiori li auditori. Questo officio havea una fiata l'autorità che ha i provedadori de comun. Et è da saper, che poleno dar per agravati la fida per do mexi, zoè la slongano ogni xv zorni, et poi la